

-48221 II 1737

Akadeemilise Emakeele Seltsi Toimetused XV

**Viies
liivi lugemik**



Tartu, 1926

-4822 II

Duplum

Vīdōz

līvōd lugdōbrōntōz




10448

Tartu, 1926



A-4822/2



Livõd lugdõb-rõntõd.

Livõ rõntõd ulz at antõd,
liedõd bildadõks puskantõd.
Nëši rõntiš ni mëg luggõm,
kui mëg jeddõped'i puggõm.

Pägiń mësti vel iz tied,
mingistvond mäd izad mied,—
mis ne atõ vaňsti luonõd,
sie at rõntõd mäddõn tuonõd.

Ni mëg emiń äb tõm maggõ, —
lõlidi eńtš irlõm taggõ,
toutõd nurms tõm vaggõ aijõ,
algõ kél' mäd sõgõ kajjõ !

Valkt.

Kaupo loul.

Tegiž ma sında nääb, tövrõz pääva !
Il' livõd mō, il' min piškiz tout
sa tulad tegiž knašist pājstam,
ak ärmastõd, térińtõd val !

Pääva, sa sür valnägtiji, sa tiedad mïnda kil :
jaramijizõks, tout kivnikaks ma um tiedõd,
ma um polgdõd, sotktõd, kaibdõd.

Minda vigtõbõd, ku vörödnikadõks
ma vol'l'i kubsõ känd,
ma vol'l'i livõdi äbõigõst juondõn,
nëd'i pa värgõks tiend, saksad jür länd.
Bet minnõn, ma kitõb, vol't' mielsõ kakš merkõ :
Sina, Rištõ Rabtõd, un Sina, min tout !

Sinnõn, Jumalõst Ovtõd, sin ma lekš andgiži vimõ —
eńtš toutõ äl, eńtš toutõ kaz ma sin ändiz,
bet sina tiedad, ku mina, Kaupo, ikštõz
amast sidamõst ärmastõz eńtš livõd toutõ.

Arthur Benedikt Berthold

(livli Amerikõs).



Nika Polmań,

livōd ežmi skuolmestar.

Nika Polmań ku opatiji algō kil sōgō leťlōz literatürōs mädöltōd, tokš tām skuol siemtōn um vond kaz leb-lebiń. Sjeda tiedabōd un rōkandōbōd vanad livōd vel Mustanumstō Sūrō-Irbō sōńi. Nika Polmańo mēg mädlōm un ovstōm ku ežmōst livōd patriötō üdājgal un pidam tända enīš piškiz tout nustajizōks un ežmōz rjeknägt'ijizōks val un kultur taka pälō.

Nika, Didrōk un Katriń puoga, Polmań um sindōn Vaidkilas, Polmań kōrands eñtš 1817 äjgastöld. Skuolmēstar tiedamōz täma, kuijennō um tjevtōb, kil lib sōnd Tālsas mingōz privatskuolsō eñtš 1835—1840 äjgastöld. Ežmi livōd skuol vol' Koštrōgōl, un täsa Nika Polmań vol' opatijizōks eñtš 1847—1857 äjgastöld. Täsa täma kilōz eñtš kuldōz kultursiemt un kitōz, ku rišting voń äbuo neijennō säl, kus um pāgiń vil'lō, bet säl, kus um gara sjeldōm un õigit, kus jumalōn tjenandōksoks lēba sōb jettöd un jagtöd.

Nika Polmań pāgiń um murtōn ka il' sie, ku laz skuol-lapst eñtš oppōmōzōks un tiedamōzōks volkstō ku luktard, kien val vōiks vōlda pa rjeknägt'ijizōks sien, kien äbuo vond vonnō skuolō lädō. Ku mēg paldiń rōkandōm il' eñtš 70—80 äjgastō tāgiž skuolažad, siz mäddōn um ka tiedamōst, ku nēši aigši skuolmēstar tie vol' pāgiń jo lälam äbku paldiń: siz izuo iz eñtšōn, iz lapstōn piesätöd skuolkoddō un rōntidi; až tōž tul vallō, siz pirg vol' emiń tuntōb äbku kińd'ōl aga lämp; až tōž kēratō, siz vol' muoštamōst guogō tibōst kēratōbtürgōst iziedō. Sel'l'ist pütökstōn um känd iñō se juvam, ku siz skuolmēstardōn um vond viš karaktōr un sūr tōmōzjoud, un sjeda Nika Polmań um tōnd amast sidamōst iekazatō ka eñtš skuol-lapstōn un eñtš tuntōbōdōn.

Nika Polmań um moištōn juvist spēlō fioltō un äbuo uigōn ka kīrast kädsō piddō (neiku se um nādōb ka tām bildastō) un ammō kädtiedō jellō. Ta um moištōn iž emiń kēl'i un um tōnd, laz ka lapst oppōgōd mingōst vōrōst kieldō.

Äb set id Koštrōgōl, bet täma um vond kulturtiesō ka Kuolkas: ta um piddōn säl kestar amatō un siepjerast ta um känd juga pivapāva Kuolkas. Ku munt eñtš tiestō piva-pāvan jennō-veitō atnovist, siz tämmōn vol' kengōmōst eñtš jälgad Kuolka puol un ðdōn volmōst tegiž Koštrōgōl konnō tāgiž, mis iztei $16 \times 2 = 32$ verštō pitka rjek.

Nika Polmań ärmastiz juga itō vōrōst kieldō, bet ama emiń livō kieldō, siestō ku se vol' tām ämakēl". Il' sie, ku mäddōn um piva Matteus evangelium rāndakielkōks

volmōs (mis um nodruktōd ežmōst kōrdō 1863. ājgastōs), il' sie mäddōn um tjennōmōst Nika Polmańtō, kis sai juvist toimōl lālam pōrtulkōmōz tiekōks.

Ku ni mēg il' sie sūr mie jelamōz un tie uomō rōškiz tuntōbōks sōnōd, siz pavańtī'om ka, kui se igvalami sāl Koštrōgōl un Kuolkas tämmōn sai lēbavī'aks aigtōd un atvaitōd. — Nēši aigši rō vol' tōvrōz kil. Vondzi vol' se opatiji, kis sai 50 rubil'čō ājgastōs palkō. Kuijennō um tjevtōb, siz Nika Polmań sai: 1) Kuolka kestar amat pjerrō id nit, kus kaziz eńtš kimgōnd vjedamt airō, mis vol' eńtšōn sajelamōst un kodai tuomōst; 2) il' opatōmōz Koštrōgōl ta sai Duońig izandōst eńtš kim vjedamt ainō un mūnda pūnda jovid'i, mis pagast piesötiz kodai. Un se vol' tikkiž!

Nika Polmańon volks vond kil sōmōst eńtš patronātōst tjenandōks il' eńtš roppōmōz vallōn vastō un sūr opatōmōz tie, bet tjenandōks azmōs tämmōn vol' kōraz bikar tijaks juomōst: Piškiz-Jrbō päpid Kupfer un Bernevič ist vōitō tānda ienādō. Ežmi um kitōn Polmańon: „Ku Tēg tōtō kalamied lapstōn skuolsō saksa kieldō opatō, kus siz laz mēg eńtš lāpši sōtōg?!" Un ku ni vana Kupfer vol' kuolōn, siz tul' nuor' pāp Bernevič. Il' tām pruovspredik Polmań vol' kitōn: „Pāp um juva, set ku ta nāb sutu tulmō, siz ta eńtš lambōd jetab un kuožōst ailōb!" — Pāp eńtš kuožōst kil ailō iz sō, bet Polmańtō ta iz vōi ienādō il' sie, ku Polmań roud tōmōz pjerrō um pāppō pallōn, algō se āndag sallōz kālmadtarast vańdi mirińlūd'i ulzō kovvō un Tartu il'izskuolōn jara midō.

Pjerrō sel'l'ist sūrizandōd äbienēmōst Nika Polmań eńtš naiz sōzarmie, vana Kubōlt skuolmēstar E. Dūnsberg abkōks vostiz eńtšōn rōškiz mōdō (ka leb Kr. Valdemar ab) Novgorod gubernijas un ei sāl eńtš 1860. ājgastōl pa-mōkinda-jizōks. Sāl, vōrōs mōsō, kuoliz līvōd patriōt 1903. ājgastōs un tām lūd novvōbōd vōrōs kālmadtaras, kougōn tōvrōst rāndast un ārmastōd izamōstō. Bet se sädgōz, mis Nika Polmań um altōn eńtš kazandōkst sidamōs, um iend nēši palam un siestō sädgōst mād ājgal um laggōn pids līvōd

randō sūr patriotisk tul'. Laz volkō ov kuožōs livōd kultur historias Nika Polmań nim, laz livōd müžōm mādlögōd eńtš ežmōz skuolmēstar, kēratijiz un patriot jelamōst un tiedō!

Rjek-keji (Albinus Berthold).

Randaneitsōd loul.

Uońdžōl varrō
lekšmō tarrō.

Kjerdōd samudōks astimiz,
jälgad kastugōks kastimiz,
keldarikkiži katkimiz,
pešlinkizsil'mi jür' jatkimiz

Uońdžōl varrō
lekšmō tarrō.

Māřidi nagrōs mēg seimō,
vāńkidi puošidōn teimō,
māzō siz nurmaigō istimiz,
mānagri kjerdōstiz pistimiz.

Uońdžōl varrō
lekšmō tarrō.
Kildzōstiz loulōs meg nītimiz,
kalamied nīžōdi kītimiz,
prišō ainō kubbō toimō,
kujjō magdōb pjerast loimō.


Valkt.

Livōd toutvil'a.

Jega toutōn um midagid, mis tämmōn um toistiz äb ku muntōn. Ama jedsō jega toutōn um jōva eńtš kēl', mingist ta rōkandōb un mingist ta ama armōks un knašíks pidab. Id toutōn kēl' um jo rikaz äb ku toizōn. Idōn um emiń sōńd'i un ta sōb eńtš kiel päl emiń mōtkidi izkitō äb ku toi tout, kien um täpińt'omōst sōńd'i mǖsti kielist, laz liedag jega ažan, jega tiemōzōn un jega mōtkōn ka

eńtš sôna. Un siz kitōb tout pāl, kis täpińt'ob munt kädst, ku sie tout kultur um jo joutōm un piški.

Bet äb ikšigiń sônad äb nägt'ot kiel rikustō. Rikaz um ka se kēl', kus um pägiń knašidi rökidi, sônakieridi un kitōbsõnd'i: ka ne nustabōd tout kulturō un nägt'obōd, ku se tout um moištōn mōtlō, um pand tādōl pägiń kovalōst un um rad'l'ōn sie tikkiž knašiži sônakieriži un kitōkšiz. Tout kovalōz kazab äjgastōdōks. Jega kazam kūlōb midagid



Mari Šaltjar.

vanad kädst un opub iż ūtō jürō. Īds kubs jellōs, nagrōs un itkōs, luštō un murtō tundōs iebōd tagan mādōltōkst un armōd nižōd, suggōbōd lōlōd un spēl'ōd, brūjkōd un ievōtamōst. Satiekōs muntkōks, sōb küldōd nānt kädst ka vōrōst kovalōst, stōstidi, pasakidi un mis äb mis. Un nei sugub jega toutōn eńtš vī'a, mingist ruost äb rik un koi äb sie. Pägiń siestō vōib vōlda kil itiz munt toutōdōks, bet tokš pägiń um ka iż eńtš muodō, mingist äb uo äb

kuskōs mūsō kuožōs ilma pāl. Un set tout kuolōmōzōks kuolōb ka tām sōnadvil'a, un siepjerast um jega tout kuolōmi kulturōn sūr kōtōks. Algō kuolōg mitikš tout!

Bet kui siz atō ažad mād, livōd, toutvil'aks? Voi livōdōn um ka mingist kulturvil'Tō aga se um undōd jōva tikkiž, kaddōn un kuolōn? — Toiž se um, ku pāgiń um jara undōd. Silist siesō uomō mēg, livōd, ama jedsō iž, siestō mikšpjerast mēg uom unnōnd piga jara ka eñtš ama ežmōz vil'a — eñtš armō rāndakiel. Pāgiń sōnd'i um kaddōn, pāgiń um täpińt'ōd leť un saksa kielstō, bet pāgiń um ka pīlōn ižeñtš kielstō. Un tērińt'ōd laz volkō jegaikš, kis piemādlōb vel mingiz vana sōna un pāstab sie kuolōmōzōst aga luob ūži sōnd'i jūrō, mingizi līb vajag!

Bet äb ikšigiń kielkōks — neiiz um aža ka mū livōd toutvil'aks: ka livōd kovalōst um pāgiń undōd un siest um vägi zāl, bet diezgan um ka papier pālō pandōd un siekōks kuolōmōzōst pāstōd. — Jōva eñtš 70—80 äjgastō tāgižpēd'ōn vol't'ō kakš sūrdō tjevdmiestō — Sjögren un Wiedemann — livōd rāndas un kēratist ežmōz (un kuńtš tāmpōz pāva sōń ājnagōz) livō kiel grammatika un sōnadrōntō, mis saitō nodruktōd molmōd Pētōrburgōs 1861 äjgastōs. Sies grammaticas um nodruktōd ežnōst kōrd ka vel 143 livōd kitōbsōnnō un 156 tabandōkst, ka lōlidi, nižidi un mōnídi, ammō kubbō 414 nummōrt. 1888. un 1914. äjgastiš vol'.livōd rāndas suomō profesor Setälä rāndakieldō študierōmōs un sakēratiz ka 423 nummōrt toutvil'l'ō. Tämkōks vol' 1914. äjgastōs ińō suomli Saarimaa, kis sakēratiz 484 nummōrt mōnídi, kitōkši un mūdō toutvil'l'ō. Pjerrō pasoul'soddō 1920. äjgastōs tul' livōd randō profesor Kettunen. Ta tul' votšōm, voi livōdi pavisōm um vel, siepjerast ku avizōd vol't'ō kēratōnōd, livōd tout vol'l'i pasoul'sodas tikkiž jara kaddōn un kuolōn, livōdi äb vol'l'i emiń mittō itō. Un mingi lušt vol' profesor izandōn, ku ta liediz livōd tout vel jelsō. Luštingōl vol't amad ēsti un suomō sugvel'id.

Līvõd toutvīlā Arhīv 1920—1926.

Materialođ lug (punktōđ pjero)	Luž	Piza	Ira	Užkila	Sīkrōg	Ire	Koštrōg	Pitrōg	Sānag	Vaid	Kuolka	Mustanum	Punktidi kubbō
Lolidi un spel'ōdi	185	11	46	4	19	23	160	106	13	89	29	2	687
Kītobsōnd'i un nōl'atōksi . . .	290	11	34	1	148	253	336	150	4	270	30	6	1533
Tabandōkši	128	15	91	8	144	22	182	38	8	244	38	2	920
Pasakidi un nižodi	175	17	68	1	132	32	298	275	10	212	41	1	1262
Il' vana usk	103	14	95	6	127	"48	204	259	9	239	43	4	1231
Il' pivad un nimpāvad pidamōz .	94	2	23	—	40	7	101	51	—	45	3	—	366
Il' riškōst, kozgōnd un bērōd .	26	5	1	—	16	4	314	341	—	303	1	—	1011
Il' rūjad arštōmōz	29	1	1	—	2	6	119	236	—	64	—	—	458
Il' alga barometōr	146	1	6	—	26	13	94	12	2	104	9	—	413
Mūd'i menīdi	89	1	3	—	38	24	201	92	—	251	1	—	700
Annō kubbō . . .	1265	78	368	20	692	432	2089	1560	46	1821	195	15	8581



Līvõ toutōrōnd Tartu muzejs
(bilda pāl Rozal Dziadkovski).

Un siest äjgast pälõ profesor izand un Väldapä nuořizand, nänt rindad kératiji, irlgist ama energiaks sakératö livõd kieldõ un toutvil'lõ papier pälõ, algõ se sõgõ emiň kunagid bäs tiedidi kuolõ. Livõd iž tul'tõ sidamõks un dūšõks abbõl. Mingiz põr äjgastõks põrsindiz neiku üz tout, kis äb kad un kuol emiň nei kjevamstõz. Laz siz pilõg se üd päl sindõn livõd tout ama iga, mûžom!

Kis siz atõ ne livõd, kis at ama emiň päästanõd eítš piškiz rända tout kulturvil'lõ, neiku se äb sõ emiň kaddõ, bet ieb ama ilman vańtõltõbõks? — Täsa iž tabel päl sõb nägt'õd, mits nummõrt lõlidi, tabandõkši, mõnídi un ammõ mûdõ um sakońčon Väldapä (O. Loorits) jegast livõ kilast. Rekord täs um piškiz Koštrog kilan, kust um sakératõd ama emiň toutvil'lõ rändas un pa-merkõks kimgõnd kõrd emiň äb ku sürstõ Kuolka kilast. Kukš kõrand tuba Koštrogõl um se kuož, kus um kératõd livõd toutvil'lõ papier pälõ emiň äb ku ädkuskõs mûsõ livõd tubas. Toi rekord um Zuonkõ kõrandõn Vaidõl, sie kõrandõn, kus kazamõst kazamõ sõni livõd mõl' un rändakel' at vonnõd pivad un ovstõd emiň äb ku midagid mûdõ täs ilmas. Kolmõz rekord um Děl'ak kõrandõn Pitrõgõl un nel'lõz Piškiz-Bél'ta kõrandõn Lüžõs. Sikrõgõl ama emiň sakératõd um K'elk kõrands, Irel Graba kõrands un Íras Bokal.

Ku pörlädõ nimid jür, siz ama ežmõz un sùr ovkuož päl pilõb Mari Šaltjär nim. Se õbdõz pääkõks un pids ammõ randõ tuntõd juva tövrõz jema um livõd tout kuldi sū, kis äb uo ikšigiň nižõn emiň äb ku mingi mū, bet kis um kuddõn un umblõn ka vel livõ õrõnd un mûdõ, mis at ulzõ pandõd Ësti tout muzejs Tartus. Sie naiz nim um sõnd tuntõbõks tjevdymiedõn il' ama ilma un täm bilda pilõb Tartu univerzitâts sâjna päl ids rindas sùrd profesorõd bildadõks. Toi täm tagan volks Griet Skadin Koštrogõl. Mûd'i nimidi vańtl'õm toutvil'a jagud pjerrõ. — Lõlid i un spěl'idi um izkitõn ama emiň Mari Šaltjär Pitrõgõl (91 nummõrt) un täm tagan libõd : Lot Lintenberg Lüžõs (57 nr.), Griet Skadin Koštrogõl (55 nr.), Anni Ernestovski

Lūžōs (42 nr.), Jōń Zēberg Vaidōl (33 nr.), Kristin Ozolzile Koštrōgōl (31 nr.) un Mari Leiše Lūžōs (29 nr.). Ama sūr kītōbsōnad un sōnakierōd sakēratiji um vond Maŕt Lepste Irel, kis um sōtōn ikšigiń emiń ku 200 nummōrt, toi rekord um Belte Jōńon Lūžōs, kis um sakēratōn il' 100 nr. Ama sūrd tabandōkst tiedajišt volks ežmi il' ama rānda Alfred Damberg Sīkrōgōl, kis um sakēratōn 98 tabandōkst; toi um Jōń Zēberg Vaidōl (80 nr.) un siz libōd: Griet Skadin Koštrōgōl (71 nr.), Ańdrōks Zēberg Vaidōl (65 nr.), Griet Nornberg Īras (40 nr.), Ougust Skadin Koštrōgōl (37 nr.), Alfons Berthold Vaidōl (32 nr.), Vilma Damberg Sīkrōgōl (31 nr.), Lot Lintenberg Lūžōs (27 nr.), Mari Šaltjār Pitrōgōl (26 nr.), Mari Leiše Lūžōs (26 nr.), Liž Volganski Koštrōgōl (25 nr.), Jōń Belte Lūžōs (24 nr.), Anni Ernestovski Lūžōs (20 nr.), Kristin Ozolzile Koštrōgōl (20 nr.) un munt. Pasakidi un nīžōdi ama emiń um stōstōn Mari Šaltjār, kis um izkitōn il' ama kubbō **229** nummōrt — se um rekord, mingist äb uo jega toutōn, örali rišting vōib un tiedab neijen nīžō! Toi rekord līvōd sjegas um Jōń Zēberg käds Vaidōl, kis ikšigiń um izkitōn 91 pasakō un nīžō; siz libōd: Griet Skadin Koštrōgōl (78 nr.), Ougust Skadin sāliž kilas (51 nr.), Alfred Damberg Sīkrōgōl (38 nr.), Rozal Dziadkovski (Ramste) Rīgōs (35 nr.), Mari Leiše Lūžōs (34 nr.), Lot Lintenberg Lūžōs (29 nr.), Didrik Leiše sāliž (27 nr.), Mari Berthold Vaidōl (26 nr.), Liž Belte Lūžōs (25 nr.), Didrik Firmań Koštrōgōl (23 nr.), Katriń Zēberg Vaidōl (22 nr.), Griet Nornberg Īras (19 nr.), Pētōr Ansenau Sīkrōgōl (19 nr.), Karl Stalte Irel (19 nr.) un munt jo veiti. Il' līvōd vana usk ama emiń at stōstōnōd Mari Šaltjār un Griet Skadin. Il' pivad un nimpāvad pidamōz um ama emiń kēratōd Piškiz-Bēl'ta kōrands Lūžōs, Kukšōl Koštrōgōl un tegiž Šaltjār Mari kädst, il' ājga un tout baromētōr — Piškiz-Bēl'tal, Zuonkōl un Kukšōl. Līvōd vańd'i ažd'i brīnōm knaššō papier pālō uzzīmōn um pa sadī Belte Jōń Lūžōs, vägi jennō atō zīmōnōd ka Eduard Ozolzile un Alfred Damberg. — Ämd'i abliži līvōd toutvīl'a

koftomōz un sakēratōmōz jūsō Valdapān um vond rāndas il' 300, — nei siz emiň äb ku 300 livliz nimid iebōd mūžōm jelam ka pjerrō nānt eñtš kuolōmōst, un tjevdmied piemädlōbōd nēd'i idstid sūr tjenandōksōks. Ežmi tjenandōks laz volkō siekōks täsa papier päl nāntōn izkitōd un



Griet Skadin.

laz ka livōd iž piemädlōgōd ovstōs nānt nimidi, kis atō livōd tout mū möilman tegiz tuntōbōks tienōd!

Ku mēg savōtam kubbō amad tjevdmied tie, kis at koftonōd un papier pälō pannōd livōd toutvil'lō, siz lib sel'i bilda: lōlidi, spēlidi un lapstrīmidi un livōd kädst

1927. ājgastō sakēratōd il' ama kubbō 812 nummōrt, kitōbsōńdi, sōnakieridi un nōl'atōkši 1876 nummōrt, tabandōkši 1282 nummōrt, pasakidi un nižidi 1467, mōńuskō, tout kovalōst un ievōtamiži 4721 nummōrt un materialidi il' līvōd tierištōd, örōnd, jelud, lōjad un il' tikkiz munt ažad emiń ku 1600 nummōrt. Se iztieks il' ama kubbō pigatagu kakštoistōn tuontō nummōrt līvōd toutvil'l'ō. Ku mēg rēkōm līvōd lug paldiń 1500 pā pālō, siz pietulaks jegaid līvliz pā pālō umbō kōdōks punktō toutvil'l'ō. Un sieks līvōd tout um ievindōn pasoul'rekord, siepjerast ku mittō kuskōs pasoul'ōs äb uo tuojsa toutō, kien pietulaks jegaid toutliz pā pālō ka neijennō pūntidi toutvil'l'ō. Se äb uo mingi brīnōm, ku sūrd toutōdōn um kubbō emiń pūntidi toutvil'l'ō sakofdōd, bet ku pōrrēkōb sie pād pālō, siz ne iebōd rāndaližist kougōn tagan. Jedsō sjeda pasoul'rekord vołēsti tout käds, bet ka ēstidōn pietulab set jega nēl'a pā pālō ikš punkt toutvil'l'ō, — nei siz atō līvōd ka eñts sugvel'išt pāgiń jedsō. Toutvil'a um ama sūr monument, mingiz līvōd tout iž eñtšōn pistō um pand, un guodō sinnōn sie jedst, līvōd tout!

Bet ka sjeda monumentō vōib vel jo sūrōks un vel jo knašsōks tiedō. Jegaikš līvli vōib täsa äbt'ō. Jegaikš vōib uzkēratō vel ūži materialidi un sōtō nēd'i Oskar Loorits nim pālō Tartu Univerzitātō, kus ämsti līvōd materiališt sugub neiku mingi kulturmuzej līvōd toutōn. Amad rāndalist! äbt'ōm jegaikš eñts joud un tiedamōz pjerrō puskantō mād līvōd tout Muzejtō!

Ul'i Kōnkamäg loul ūlōdkodastō,

Vāldapā-nuorizandōn sotōd.

Tēriñtš sinnōn, Vāldapā,
mikš äb sinda jembit nä?
Sa ju rāz kil mēd'i brīd'ist,

sjeda-toda mädkōks strīd'ist,
mikš äb rōkandōm eñtš kieldō,
mäz äb panmō māmie ieldō, —
siepjerast tāks sında tjennō,
oks ka äb tied äds kui jennō.

Paldiń ma uob ūludkodas,
livō rovvō brīvibsodas,
sīd ma viñstōb ūd pāl sindō,
ilma koval jära vindō ;
täsa rōkandōd sāb toiž,
se um sūr kil optōbkuož,
sīd ne filozōfōd āt,
se um univerzitāt,
se kis vōib sie ekzam andō,
se sāb livōd vañkō kandō !

Loul um sindōn ūlōdkodas, 20. p.
sōvkus 1922 vana ajga pjerrō.

Kjevaldlīndōd.

Pāva lemdō sātub,
kilma jara kātub,
kjeval jūrō tulub,
luim ni jara sulub.

Klūkōd, parid, guogōd
votšōbōd kus ruogōd,
ärmaž kuož um jära,
kus äb val'st nänt kāra !

Lindud knašist lōlabōd,
muñdi pjeziz kāndabōd,
pjerrō iringōbōd siz oudō,
piškiži laz sāgō joudō.

Pivalind pids suodō
vankl'ub, mis vōib tuodō
piškist lapstōn siedō —
kuona aga liedō.

Ulan allō pešlinki,
illō lōlab tširlinki,
Ljegarasta ābōs,
ēn kävb bořidi knābōs.

Valkt.